

PÓ-LÔ KIÀ HŌ· HUI-LĪ-BŪN Ê PHOE (57)

¹Choè Ki-tok Iâ-so· ê siū-hoân, Pó-lô, kap hiaⁿ-tī Thê-mô-thài, phoe kià hō· goán só· thiàⁿ tâng tiòh-boâ ê Hui-lī-būn, ²kap chí-bē A-hui-a, í-kíp kap goá tâng tng peng ê A-ki-pò·, kap chū-chíp tī lí ê ke ê kàu-hoē; ³goân lín tui lán ê Pē Siōng-tè kap Chú Iâ-so· Ki-tok tit-tiòh un-tián pêng-an.

⁴Goá siōng-siōng kám-siā goá ê Siōng-tè, tī goá kī-tó ê tiong-kan siàu-liām lí; ⁵in-ūi thiaⁿ-kìⁿ lí ê jîn-ài kap lí só· ū ê sìn, chiū-sī òng Chú Iâ-so· kap hián-chhut tī cheng sèng-tô· ê; ⁶goân lí ê sìn ê siong-thong ū kong-hāu, thang chhim chai lín tiong-kan bān hāng ê hó, lâi kui tī Ki-tok. ⁷Hiaⁿ-tī ah, goá ūi-tiòh lí ê jîn-ài toā hoaⁿ-hí, toā an-ùi; in-ūi sèng-tô· ê sim tui lí tit-tiòh an-hioh.

⁸Só·í goá sui-jiân tī Ki-tok ū thang hó-táⁿ chiong só· hâp-gī kiāⁿ ê hoan-hù lí, ⁹tók-tók in-ūi saⁿ-thiàⁿ ê iân-kò·, lêng-khó· kiū lí; goá chiū-sī nī lâu ê Pó-lô, hián-kim iā ūi-tiòh Ki-tok Iâ-so· lâi siū koaiⁿ-kaⁿ. ¹⁰Goá ūi-tiòh goá ê kiáⁿ, chiū-sī goá tī koà thih-liân ê sī só· sīⁿ ê, O-nī-se-bó·, lâi kiū lí; ¹¹i cheng bô lī-ek lí, hián-kim chiū choè lí goá ê lī-ek; ¹²goá ū chhe i koh tò-khì lí hia; chit lâng chiū-sī goá ê sim-pak. ¹³Goá pún ài lâu i kap goá toà, thang tī goá ūi-tiòh hok-im koà thih-liân ê sī, thoè lí hók-sāi goá. ¹⁴Chóng-sī bē chai lí ê ì-sù, goá chiū m̄ ài choè sím-mih; sī beh hō· lí ê hó, m̄ sī chhut tī bián-kióng, sī chhut tī kam-goân.

¹⁵In-ūi i chiām-sī lī-khui lí, kiám-chhái sī beh hō· lí thang éng-oán tit-tiòh i; ¹⁶m̄ sī iū-goân choè lô·-pók, sī iāⁿ-kè lô·-pók, chiū-sī choè só· thiàⁿ ê hiaⁿ-tī; goá sít-chāi khoàⁿ i choè án-ni; hô-hòng i sī lí ke-lāi ê lâng, koh sī siók tī Chú ê, kiám bô koh khah thiàⁿ i mah?

¹⁷Só·í lí nā liáh goá choè tâng-phoāⁿ, tiòh chiap-láp i, chhin-chhiūⁿ chiap-láp goá. ¹⁸I nā ū khek-khui lí, á-sī khiām lí sím-mih, thang sng goá ê siàu. ¹⁹Goá Pó-lô chhin-chhiú siá, goá beh chē-giáh; bián goá ká lí kóng, lí só· khiām goá ê, sī lí pún-sin ê sīⁿ-miā. ²⁰Sī lah, hiaⁿ-tī ah, hō· goá tī Chú tui lí tit-tiòh hoaⁿ-hí; hō· goá ê sim tī Ki-tok tit-tiòh an-hioh. ²¹Goá í-keng chhim sìn lí ê sūn-thàn, chiū siá phoe hō· lí, in-ūi chai lí só· beh kiāⁿ ê, oē kè-thâu tī goá só· kóng ê. ²²Koh iā tiòh pī-pān só·-chāi hō· goá toà; in-ūi goá òng-bāng tui lín ê kī-tó, Siōng-tè beh chiong goá siúⁿ-sù lín.

²³Í-pa-hut, chiū-sī tī Ki-tok Iâ-so· kap goá choè tâng koaiⁿ-kaⁿ ê, chheng-an lí; ²⁴kap goá saⁿ-kap tiòh-boâ ê Má-khó, A-lí-tát-kó, Tí-má, Lō·-ka iā chheng-an lí.

²⁵Goân lán ê Chú Iâ-so· Ki-tok ê un-tián kap lín ê sìn saⁿ-kap tī-teh. À-bēng.